




1133



攻  
媿  
集  
  
五





Inches 1 2 3 4 5 6 7 8

Centimetres 1 2 3 4 5 6 7 8 9 10 11 12 13 14 15 16 17 18 19

Blue Cyan Green Yellow Red Magenta White 3/Color Black

TIFFEN Color Control Patches © The Tiffen Company, 2007







攻媿集卷十三

宋

樓

鑰

撰

今體詩

陳文懿公

居仁


輓詞

眾口推文伯何人識吏師義襟惟古有心地只天知至  
死終無玷平生本不欺在公無可憾猶恨哲人萎

珍館徑歸鄞人猶望秉鈞郵傳千里訃哀動五州民躡

踊森賢嗣攀號感路人公乎不亡矣袞袞看簪紳

宅相惟公久伊余忝後塵十年追桂籍兩禁踵詞臣接





武參吾舅承顏奉老親幸成三學士何意失斯人  
一別屢經歲歸舟已及門方期情話悅空訝語音存善  
行傳千載蕪詞愧九原傷心歌楚些無地可招魂

丘文定公 審 輓詞

謀國規模闊絕人才具高三朝千載遇四海一身勞儒  
將通駕序樞庭握豹韜皇家資柱石天遽奪伊臯  
初擬文翁化誰知懷遠圃廟謨專制閩世將易兵符養  
虎竟遺患斷蛇由不殊寧同死諸葛空恨失吞吳  
處事拘孿外鋤姦談笑中幾年亡主將全蜀賴明公畏

愛盾衰日清和夷惠風屢書終不盡詩意亦何窮

王忠文公 十朋 輓詞

夙負敢言氣輸忠不愛身劉蕡仍遇主綺季更憂民治  
行真循吏風稜古諍臣摺紳千載恨不得究經綸  
梁木今其壞誰能問大鈞恩深兩宮賻哀慟四州民已  
矣天人策傷哉社稷臣吾生良可恥不及見斯人

婁忠簡公 機 輓詞

壯歲志先定耆年氣不衰治高爲縣日名重佐州時雅  
望登朝著忠言徹帝輝亨途日千里闊步不容遲



邊事釁初開惟公論不回深謀比婁敬極力阻王恢兒  
戲何堪用冰山忽已摧朝廷始更化大老盍歸來  
共政三年久蜚英四海尊色詞無假借風裁弭囂喧但  
欲持公道寧容啓幸門經綸終未究猶有典刑存  
寮案待儲闈如公久任稀載欣商皓起終惜漢疏歸問  
字煩參訂談經賴發揮一書真總要星日重光輝  
得姓共東樓同朝兩故依文編切二序誕日頌千秋老  
矣俱宜去公乎不少留來書墨猶濕展讀淚空流

程文簡公

大昌

輓詞

論著大哉堯英聲早已昭橫飛欽遠業特立仰高標言  
議超千載風猷聳四朝惜乎經世學不及珥金貂  
太上崇耆舊龍鱗手可攀胡爲遯荒野竟復老商山漢  
閣頒綸渥瀛壖擁旆還靈光遂陳迹西望涕空潸  
設卦探義畫隨山究禹謨仰天真見象畫地可成圖健  
筆凌前輩殘膏泮萬夫登門嗟最晚猶得覘宏模

楊武恭王

存中

輓詞

歷數中興將誰爲第一功兩朝忠衛上四海雅推公富  
貴無危溢哀榮有始終吾知尚遺恨不見朔庭空



勇氣真虓虎仁心劇放麕推鋒多折馘解縛屢招攜細  
柳門堅閉長楊馬不嘶夜深星忽墮何處問撐犁  
父祖成完節丹心激懦夫枕戈梟逆首撫劍志伊吾忠  
孝公何媿哀榮世所無從今紫荷橐接武上亨衢  
王爵報元勳臨危更敢身鯨波飛戰艦狼子歎江神木  
落淮南暮塵清塞外春功臣誰第一圖畫在麒麟

沈憲敏公

補輓詞

天使魁鄉薦上合卿改官蚤我烏府豈終著侍臣冠持  
節威行惠專城猛濟寬紹熙多舊學胡不相宮端

仕宦接王楊諸公嘆老蒼門生多紫禁子舍屢黃堂自  
得垂車樂誰傳卻老方桃花千樹滿空憶舊劉郎  
徐邈今非介申棖焉得剛立朝無附麗受謫更芬香戲  
綵衣冠盛園基日月長典刑今已矣無復歸靈光  
持論真遺直操心本至公羸貴寧市籠平寇不言功光  
祿文階峻嘉興色養豐誰能死生際猶得教之忠  
晚出荷公知登門未覺遲通班依漢橐試郡守蕭規藻  
翰猶頻寄宮牆不再窺新阡何處是西望不勝悲

林正惠公

大中

輓詞



愛直趙清獻忠文范景仁累朝推舊德今日見斯人正  
色欲劇上敢言寧顧身紫樞方大用惜不究經綸

去國名逾重還朝道益尊清虛懷骨鯁嚴冷帶春溫公  
綽真無欲臧孫尚立言騎箕雖永隔精爽儼如存

凜凜古循吏堂堂真巨公死生忘度外邪正炯胸中憂  
世心誠切籌邊事已空龜潭山水流淚與無窮

觀文殿學士陳公驥輓詞

台嶽鍾神秀居然社稷臣海涵書萬卷魁冠數千人南  
服頻懷綬西垣屢演綸惜哉真漢相不遂秉洪鈞

幾見衣冠偉終聞羽翼成先皇崇舊學大政任名卿神  
器親傳授崇朝再太平功成身自退寵利一毫輕

朝著登門久詞林辱眷深代言稱據古議禮許同心去  
國臨歸路還家寄好音病中間赴告老淚動盈襟

觀文殿學士趙公彥逾輓詞

千古盛周宗皇朝實比隆謂多擔責爵誰見立王功一  
語國先定寸心天與通龍飛稽事實信史詔無窮

授受唐虞際從容平勃間宗英誰柄用人望屬樺閣晚  
侍經闈讀寢登秘殿班帝鄉留不住歸去老湖山



麾節稱循吏三朝藹政聲治如黃霸最心慕伯夷清諸  
 道俱遺愛兩川尤著名起家臨制閭更羨錦衣榮  
 聽履領簪纓忠言徹帝庭公方扶日月我亦寄雷霆憂  
 世形辭色臥家存典刑靈光更陳迹楚些不堪聽

端明殿學士汪公

應辰 輓詞

制闈詩書帥公朝侍從臣身能全進退人可得疎親曳  
 履聲猶在持衡迹遂陳從今幾百載更復見斯人  
 蚤歲聲名大婆娑始遇時難兄屏隔坐令子桂芳枝人  
 望還為用天胡不憖遺成蹊堪喻大墮淚不須碑

道學不盡試功名祇緒餘立朝惟正色薦士有遺書百  
 贖嗟無及九京誰與居莫酬推轂意哀淚濕巾裾

端明殿學士張公

輓詞 舊訛 宋史本傳改正

籍甚張京兆精神滿腹中才高解牛刃手敏運斤風河  
 許恩波遠塵間狡穴空章臺舊時柳無復映金狨  
 英略古無對外庸今最良衆方期共政人已歎云亡不  
 聽尚書履猶懷太守章匡廬星忽墮丹旆裊清湘  
 昔幸參朝列子公更有連規撫包世界風義薄雲天送  
 別詩猶在貽書墨尚鮮偉人無復見惟務寶青氈



仲舅敷文閣學士汪公輓詞

籍甚牢之舅難追宅相風惟公能愛我獨我最知公潭  
府書無繼西州事已空形容盡心力庶或慰幽宮  
外氏桂成叢諸甥長養中名稱無酷似宦達偶相同澹  
室既長往適齋俄考終絕憐三學士只賸一衰翁

樞密謝公

廓然輓詞

臣主一意合風雲平地生立朝專論諫爲國總樞衡行  
矣登三事悲哉奠兩楹輟瓜恩意重終始備哀榮  
千古台山秀名流列鴈行惟公登政路一旦破天荒故

里空華屋佳城映夕陽送車無路到東望淚浪浪

尚書尤公表輓詞

敏甚五行下毫釐恥不知千人揮筆陣萬卷納須彌有  
夏傳追蠡先秦拾斷碑鄴侯書插架分付稱家兒  
憂國言多切問天力有餘衆推真學士上念老尚書直  
道終難進高懷只遂初梁溪釣游處此意竟何如  
舊學方登用公來領從臣末光依日月聽履上星辰共  
政將圖舊騰章屢乞身甘盤終罔顯雨露未霑新

北面願師承東臺拜老成忘年客末坐敘契若平生風



月吟千首雷霆寄一名送車無路到寒涕為君傾

尚書湯公 碩 輓詞

先正真良弼彤墀四拜麻決科承奕世擿藻擅傳家禁  
路優持橐侯藩幾建牙相門宜出相恨不見隄沙

奏邸崇先契周旋古括州殿庭觀唱第海郡繼承流方  
快飛騰上俄聞汗漫遊鳳凰山下路丹旆想悠悠

尚書張公 抑 輓詞

文靖饒風度高皇記曲江賢孫真是似才氣號無雙幾  
見持英蕩終看擁碧幢誠齋主詩社到此亦心降

撫字推循吏論思領從班宏才名北闕高興屬東山同  
歲叨崇篤比鄰足往還舊遊成昨夢哀涕不勝潛

商侍郎 飛卿 輓詞

矯矯真御史風生白筆端出持膚使節始著侍臣冠給  
饜鬢先雪籌邊心為寒天乎驚玉折不及上金鑾

所至仁聲著甘棠幾去思敬羨嗟哭子伯道痛無兒郎  
省傷連璧文闈見刻辭邊民紛墮淚忍讀峴山碑

顏侍郎 度 輓詞

宴坐勿菴上睠顏亦是顏平心真似水立說信如山屢



擁皇華節重登清禁班始終無玷闕風裁許誰攀  
 祿養嗟何及朝朝飯一僧移忠躬蹇蹇錫類日烝烝報  
 政優吳郡知賢仰阜陵清忠與公恕餘慶啓昆仍  
 贅倅丹丘日眼看康濟泉同朝叨獎與侍坐得周旋妙  
 畫多傳寶遺文合細編典刑今已矣西望涕潸然

曾侍郎炎輓詞

文獻南豐裔源流曲阜公巖巖雙法從凜凜舊家風金  
 玉方交映人琴忽併空平生心地直流慶尚無窮  
 紫陌尋春日惟公最少年鱣堂慚隗始熊軾媿盧前寄

我書猶濕思君迹遽仙同登今有幾揮淚撫遺編

少保李公孝友輓詞

戚閑疏恩厚勲門積慶餘弓彎飛將臂架插鄴侯書六  
 纛秦官重三槐漢相如惜哉終半百聞者為歔歔

錢殿撰佃輓詞

雋譽蜚庠校孤忠動冕旒救荒心欲斷憂國鬢先秋惠  
 滿長江水風清入詠樓禁途交一臂人物等閒休  
 粉社歸來晚翛然得故吾哦詩頻刻燭點易細研朱有  
 淚悲連璧無階莫束芻名門餘慶遠丹穴看奇雛



趙待制 粹中 輓詞

明主晝三接清班歲九遷一居周柱史徑入漢甘泉批  
 救嚴東省掄材上小天平生經國志惜不冠貂蟬  
 詩近劉賓客手追歐率更雙旌古良吏萬卷老書生世  
 諦浮雲薄生緣曉夢驚吁嗟東向議何日遂施行  
 半世誰知己登門意氣傾交情忘父行文會忝余盟持  
 論先忠厚談經嘆老成幽光誰爲發落筆淚縱橫

吳待制 博古 輓詞

御史再乘驄忠言沃帝聰處心平似水疾惡迅如風遇

合嗟何晚論思信有功惜哉辛佐治竟不到三公  
 三仕入儲闈堂堂夾日飛初同四皓起終作二疏歸冰  
 玉清班近衣冠盛事稀聞君忽仙去西望是耶非  
 東甬預賓興文闈賴主盟菲葑無下體衣鉢有門生劍  
 佩今何處樽罍空復情自慙無報所老淚爲君傾

楊待制 王休 輓詞

望重威無怒仁深勇有餘百年憂國志滿篋薦賢書德  
 政不勝載才猷未盡摠佳兒人物似真可大門閭  
 蜀道名天險馳驅敢憚勞劍頭懸六印夢裏益三刀漢



殿聯簪橐燕山擁節旄惜哉覘國意不得試龍韜  
 蜀用東南彥皇家屬意深貳卿頻報政上相最知心泛  
 宅俱杭葦同朝擬斷金廟廊期引類疾病兩侵尋  
 事契因同薦交情晚益親半生交會少萬里宦游頻別  
 後書猶濕歸來迹遽陳何能發潛德空有淚霑巾

許待制 手 輓詞

蚤擅文章價名公屢品題碑銘摹諫省丘壑訪愚溪得  
 句追飛兔擿毫走怒猊遺編聞好在後學仰筌蹄  
 十載更麾節陽春萬里同時時逢蜀士一一話文翁到

處留遺愛諸郎守教忠慶源知未艾往日有陰功

陳秘撰 舉善 輓詞

陳氏多名德茲來慕典刑宮端驚宿草 謂那彥 案那

子詹事諡獻 肅宋史有傳 秘撰又泉局自古有遺直 彥名良翰官太 祇今誰獨醒蒼

蒼何可問者舊日凋零

跬步不忘孝掇皮皆是真移忠思致主務實見臨民三  
 諫言猶炳平生迹遽陳清風凜衰俗自足盪秋旻

王給事 信 輓詞

主眷逢千載龍光傾一時銓曹著官簿禁掖粲英詞論



議推東省威聲愴北夷平生經世意懷卷竟何之  
宦學素稱豪仍聞吏事高精神雖腹滿撫字亦心勞  
輔連三組沈疴見二毛胡牀庾樓在殘月墮江臯

余給事

崇龜

輓詞

烏府仍螭陞銀臺更掖垣事幾無弗論外似不能言厚  
德鎮浮薄平心剴劇煩用才殊未盡無地可招魂  
桂籍兄聯弟蘭階子克家上恩嘉踵武京秩為增華朝  
著蒙傾蓋綸闈觀判花遽成千古別南望想悲笳

史敷文

彌正

輓詞

八行諸孫盛三公嗣子賢連收四鶚薦祇欠一青氈郎  
省刑章肅侯邦政譽傳平生憂國意齋志入重泉  
學問源流遠樂哉賢父兄人琴亡舊曲風木愴寒聲深  
痛幾成毀沈疴沆喪生孝恭無可憾猶得傍佳城  
少小相從久自慙雖甲辰交情日加厚姻好晚逾親別  
去驚葭律歸來見棘人西莊行樂地望斷為沾巾

袁府君

文輓詞

家學傳三世凡間無二書力行真勇猛進取故舒徐前  
輩多遺墨先人祇故廬後來窺甕牖

案袁文字質甫有雜著一編名曰甕



牖開 評 志士為歛歔

坦坦幽人履恂恂長者言憂時見顏色樂道竟丘園隱  
行推同氣高賢萃一門四明耆舊傳他日數諸袁

周路分長臣輓詞

蚤負功名志從戎豈素心治軍先肅靖游藝亦精深湖  
海開豪氣雲天廓義襟高門尚餘慶蘭玉正森森  
台嶺論交契天街惜別離飛書能幾到埋璧遽成悲舊  
識歸樵句在丹丘時探梅浮江李使君有樵字韻詩公和篇最工云卻從谷口問歸樵 愁看  
結局詩紫髯無復夢空有淚交頤

趙左司鞏輓詞

行誼高餘子文章自一家嶽神均客禮敵國歎才華直  
節曾無苦全瑜更不瑕儒流有遺恨不見草黃麻  
淮甸爭錢幣夔城辦戎兵詔歸南郡近公去北門輕避  
寵若將浼求閒竟不成亦期無適莫一笑老于行  
許國終無撓居家不願餘深蒙明主眷未覺故人踈高  
論三千牘陰功四一書佳兒承積慶端可大門閭  
鄉貢早馳譽耶潛方比肩求仙客我學成佛嘆君先天  
癸年將暮金丹語未圓忽傳長別偈天闕散雲烟



王提刑正功輓詞

廉白眞家法原由金紫賢兄辭嶺南賻弟卻澧陽錢築  
屋吾將老藏書手自編老成俄已矣聞者爲潸然

籍甚青箱學醇乎赤子心片言皆可復一僞不容侵處  
事幾游刃論交欲斷金諸郎傳素業桂子看成林

二廣外臺首威棱著一門志期諸郡肅忍見匹夫冤奮  
擊猶鷹鷲興讒有兔爰投閒了無恨此意與誰論

伯仲三珠樹優爲一世才人琴先起恨金玉遂俱摧南  
阮方深痛阿連尤可哀桃花源上路老眼更堪開

王大卿正己輓詞

少壯節先著年侵氣不衰忠雖由父教清亦畏人知處  
世無求合安時竟數奇甘泉人物會一老漢空遺

麾節東南半澄清冠一時權輿周翰傳頂踵阜陵知自  
謂二宜去人稱三不欺卷懷終未盡流慶稱家兒

圖史但環堵江湖幾問津雖多暮年樂誰忍半生貧海  
內清名滿毫端秀句新風流嗟頓盡晉韻更何人

老去王摩詰歸來道更全賸添天美祿眞得地行仙日  
欲增三徑君胡欠百年桃源不無路重上慘風煙



劉吏部 僕輓詞

總角異羣兒庭趨蚤學詩一鳴登桂籍百里靜潢池所  
至清民瘼平生號吏師即闡方進用何乃棄明時  
剽劇最雲間題輿上越山洞庭王澤遠庾嶺使星還中  
道趨臺治名曹切近班陰功多及物陽報看循環  
誰擾奚山衆焚林獸已窮徙薪能遠慮下瀨得深攻南  
嶠肩隨息中朝論愈公但知分謗喜寧肯自論功  
兄長與慈恩相親色笑溫公方持使節余忝代王言共  
約遊三徑俄悲作九原佳城隔風浪丹旆滄飛翻

朱南劍輓詞

再世文章伯三朝侍從臣傳家推篤學遊宦肯謀身別  
駕歌章水甘棠想劍津虛堂兩遺像誰不信傷神  
朔望第一客巡察意更親有詩欣和韻不飲喜娛賓名  
帖藏中古珍茶試早春據叢猶矍鑠何遽迹成陳  
碁戰久不對詩盟亦寢寒方期會真率乃爾變悲歡歲  
晚本無憾情深那忍看佳城何處是東望淚洸瀾

石南康 輓詞

挺挺石可轉恂恂衣不勝平生憂國志長夜讀書燈大



易窺三古中庸進百能惜哉天不憇無復見川增

家有春秋學淵源更得師風高蓋公含淚落蔡邕碑官

早終難進才全竟弗施遺編屬賢子孝謹不應衰

伊昔為君御儒流賴主盟執經容後進傾蓋若平生坐

見埋黃壤空勞望赤城友朋相與泣反袂不勝情

鄭華文 若容 輓詞

蚤擅春秋學賢關第一流少公清澤國贊府著神州試

邑人交薦還朝譽更優如何急流退不使上瀛洲

籍甚柯山政兒童識貴温 案本集有賀鄭貴温寺丞直華文閣致仕詩貴温當是若

容之 字 歡謠聞魏闕殊寵鎮吳門就養家傳子休官澤及

孫吾鄉耆舊傳千載德彌尊

兄弟忝同登論交最有情顏波知勁節徹底嘆真清正

爾尋姻好胡然喪老成抱疴難執紼揮淚望佳城

袁通判 章 輓詞

大道知如路一心長似齋耄期稱不倦曾次樂無涯孝

謹古難及友恭人自懷無瑕夜光璧黃壤痛深埋

盛德不容贊多言可奈何大圭原不琢古井竟無波前

輩苦凋謝後生誰琢磨同庚適齋老託體共山阿



僅有一區宅曾無二頃田相過惟載酒至老不言錢幾  
得拜牀下何堪哭道邊門人多著籍下馬向新阡

張工部

季精

輓詞

忠簡傳清白家聲屬弟彛惟公殿諸老積善見多孫兩  
桂昌書種雙椿藹慶門壽終無可憾況有典刑存  
壯歲登郎省旌麾歷五州仁聲號循吏治行最諸侯憂  
國言多切籌邊慮更周積薪無恨望終老得夷猶  
敕局同寅舊雌堂屢肯過故人今有幾朝士更無多問  
信書猶濕相望鬢已皤忽聞埋壁痛薤露不成歌

高端叔

元之

輓詞

百氏極旁搜潛心老不休鄰光時自照簞食孰堪憂弟  
子多藍綬先生竟白頭妻涼數間屋知我獨春秋  
鐵石賦梅花閒情由玉瑕兩公終磊落千載敢誼譁清  
節成瑰偉浮詞尚蘂芽君看死生際不見一毫差  
滿卷變離騷歐公一素袍豈惟將厚意要使句殘膏宿  
草成千古生芻爲一號雖無韓子誄貞曜本來高

趙提刑

子濛

輓詞

毓秀從天派盱衡動至尊使星方炳耀卿月遠侵昏已



矣悲吳館誰歎護北門慶源流未艾文獻藹諸孫  
處事才游刃論文辯粲花英姿凜熊豹健筆走龍蛇持  
橐身終外垂車夢到家平原花木在愁絕舊生涯  
客授早登龍襟期一笑同門清心似水論正氣如虹近  
問書猶濕重來跡遂空無因送丹旄老淚灑西風

李撫州

庚輓詞

與物初無忤臺評反謂傾麾符成漫仕林壑寄平生跪  
履嗟何晚揮犀空復情天台隔風浪無地拜佳城  
李下真無徑門前可設羅詩如翰林逸書似鄴侯多奇

字今誰問遺編尚不磨從來好哀輓薤露忍興歌

蚤歲文聲振長沙見賈生積薪看晚輩推轂致名卿子  
舍真連璧生涯付短檠風流今李漢極口贊冰清

張欽州

舟之

輓詞

少誦東臆句從君見典刑義襟希竇十才刃比庖丁古  
鏡悲鸞偶寒原愴春鷄恂恂守家法蘭玉滿階庭  
姻好自諸馮東牀取阿戎平時深念我晚歲忍銘公書  
字今猶濕心期誰與同回頭三十載灑涕向西風

錢江陰

似

輓詞



庚嶺梅花暖賢侯惠愛深精神雖滿腹撫字亦勞心九  
轉竟難遇二毛何處侵傷哉東逝水無復大江陰前知南安

軍移知江陰

客授向東甌君爲郡督郵豈惟寮契篤更喜吏才優每  
嘆頻年別俄驚一夢休虞山渺何許淚落不能收

李刪定

叔益輓詞

積善務增厚求名惟恐多白圭寧有玷古井竟無波讓  
法資修定監州極撫摩佳兒傳素業留眼看巍科  
冰玉心相照誰云內舉私深居無浪出清節畏人知尙

憶紫芝字無慙有道碑填空雨黃葉西望不勝悲

樊運使

光遠

輓詞

科目公餘事南官第一八七聞新使節三署舊儒臣倦  
拜方辭餽哀良莫贖身家聲知有繼仙桂兩枝春  
橫浦云亡後斯文付此賢命其隨道喪學又絕心傳河  
洛湮來派西州憶舊緣傷心耆老盡揮淚對霜天

丁寺丞

允元

輓詞

家世傳經術膠庠藹雋聲上方思舊學公乃擅專城淶  
上功尤著潮陽政愈明哀哉鍰流水猶解不平鳴



嚴冷不可向其中實曠然行藏睽素志燕樂了餘年鶴  
化人何處鸞孤影自憐才高不盡用流慶尙綿綿

曹工部 耕 輓詞

箕穎文章士儀同社稷功惟公承慶裔有意振家風祠  
祿真崇道郎潛嘆老馮傷心循吏手齋志九原中  
宦達推公早丁年備皂衣幾爲銅虎去終向石橋歸齊  
國世臣少貞元朝士稀松風談笑地回首倍歔歔

范致政 醇 輓詞

義俠久無迹吾鄉見此翁紫微欣稅駕飛將許同功銀

茜聯恩渥金蘭藹義風雖增羸博恨猶喜桂成叢

酒後昇平曲閒中安樂窩千金曾累致一醉竟無何老

驥志空在孤鸞悲亦多相望纔歲許託體共山阿

梁審計 季琦 輓詞

壯歲蘄頭角夷途試著鞭羣公爭倒屣諸老亦忘年論  
議傾朝譽功名短世緣神傷賢伯仲風雨夜無眠  
壽夭固難問吁嗟不忍言嬰啼摧玉樹衰淚灑芳萱事  
契深羣從英才愴九原悲吟慙楚些無地與招魂

呂崇德 畫問 輓詞



剽劇推才刃臨機妙斲輪傳家得清白滿腹是精神未  
 上金閨籍空留花縣春善人陽報在蘭玉正詵詵  
 回首情親處相過瀨水陽十年能幾見一疾痛云亡縣  
 郭山空秀家園橘自霜主人今已矣鷗鷺亦淒涼

王縣尉

彦正

輓詞

幹蠱恢才刃誰能負殖私人皆競毫髮我獨破藩籬風  
 雨空殘夢池臺愴昔時板輿臨穴處行道亦興悲  
 潤屋公餘事能爲人所難蓼莪遺恨在夜雨舊盟寒家  
 有書堪讀囊無錢爲看情親悲不那望絕旄飛丹

唐舍人

關

輓詞

鴈塔名三世螭坳侍九重循循儀學館謬謬著囊封至  
 性悲三釜高懷薄萬鍾典刑傷不見哀涕忽無從  
 夷路方馳轡甘泉喜問津廟廊平日志露電百年身捐  
 掌雖多恨爲箕自有人發棠陰德在陽報質蒼旻

徐少卿

子寅

輓詞

聖主一言寤長淮千耦耕山川皆在目草木尚知名盍  
 被腰金寵徒爲攬轡行諸郎龔餘慶定自不慙卿  
 所至多遺愛丹丘最有聲奉常千載久攀戀一城傾已



恨數離別寧知隔死生湖邊舊門巷一到一心驚

陸提刑 沈 輓詞

數馬謙恭甚揮犀色笑溫風流士龍裔文采左丞孫晚  
幸成三徑身胡遽九原素欽仁者勇大獄竟平反  
早歲擅詞場夷途列鴈行一麾分楚甸雙節照江鄉蓮  
社容寒晚葭苧接老蒼八旬俱已矣回首倍淒涼

陸參議 沈 輓詞

中外衣冠盛流傳識後凋聲名三語掾身世半僧寮寶  
晉書尤逸坡仙隱可招梅溪殘月墮蕪沒舊風標

節吏先儒雅低徊五十霜萑蒲掃韶石桑柘滿黃岡知  
已平津老家傳刪定郎八龍無半在風雨夜侵牀

蔣慈谿 鶚 輓詞

伊昔丹丘去相逢意氣傾樓前巾子秀山下育泉清敬  
梓情逾厚交梨論益明妻京千古意潮落又潮生  
下筆欲生風磨礪日有功推敲詩益鍊駢儷語尤工經  
問南雷叟家傳十八公詞人誰可繼文陣滑稽雄

吳大監 飛英 輓詞

庠校聲名早朝廷譽望尊忠言如日皎笑語若春溫四



擁皇華節屢登金馬門用才終不盡流慶在仍昆  
曠典將行日南宮得舍人銓衡輕易地造化漫勞神舊  
事誰能記交情我獨親吁嗟三昧手不見掌絲綸

俞通判 茂元 輓詞

強仕賦歸去頻年亦漫行宦情雖淡泊官事極精明贊  
畫王公幕監州亞父城佳兒守遺訓清白勝金籬  
象邑推三俊靈光賴此賢老成俄已矣遠邇為潛然孝  
敬心何極公平錄尚傳佳城隔風浪忍賦薤歌篇

陳崇道輓詞

學造龜山蘊詩傳汝水餘于公足陰德陶令竟間居白  
業追連社丹經授寢虛 其父號寢虛先生 平生了無恨善類勿  
歛歔

未第聲先振纔官節已奇精誠與神合隱行畏人知晚  
境終無玷遺文尚可誦功名齋志歿回施稱家兒


鮑潮州 肅 輓詞

三試皆前列一官何後時低徊廣文舍齟齬使君麾遇  
事有如燭衛生寧及葵舊游成隔世流涕讀新碑  
客授壬辰歲魏科盛永嘉芹宮屢揮塵竹院幾烹茶假



守深交誼清談及道家猶懷郡齋晚羣雀噪簷蛇

攻媿集卷十三



攻媿集卷十四

今體詩

宋

樓

鑰

撰

趙路鈞

不枯

輓詞

蚤歲游金闕霞冠拜紫宸  
可堪天寶亂及見會昌春  
宛王孫態飄飄物外身  
靈光愴陳迹遺老更何人  
諸父論交久忘年許預盟  
登山陪躡屐泛月共飛觥  
來往開三徑安閒羨一生  
山深妻薤露愁憶醉歌聲

姜總管

浩

輓詞



及見開元盛會聞正始音雕蟲徒壯歲冠鵠豈初心論  
事風生席疏恩帶錫金精神空滿腹愁絕病沈沈

富盛俄遭變艱難却起家田園新活計詩禮舊生涯仙  
桂應傳秀庭蘭更茁芽真歸了無恨超微妙蓮華

祝通判 鐸 輓詞

坦坦曾無我休休蚤見幾虛舟寧忤物抱甕自忘機老  
去心逾壯歸來事已非賞延推不及有子尙家肥  
花縣弦歌化蓮城水竹居舊寮情意厚近別信音疎不  
作三刀夢空垂別駕車新阡何處是東望倍欷歔

求參議 子紹 輓詞

累世朱陳舊宦游多向鄞飛鳧觀政美展驥愈情親久  
草歸田賦欣迎入幕賓斯人忽千古望斷剡溪濱  
玉立期清貴龐眉望壽齡父兄嗟奄忽姑姊亦凋零厚  
德今誰在佳城慘欲局孫曾聞競爽蘭玉在階庭

朱坡史居士輓詞

巖邑富人物才惟史氏多流傳有丹桂遺逸嘆朱坡學  
飽終難售詩成祇自哦空餘著書在令子挹餘波  
交友俱名士儀曹禮意周使華臨夏口詩興共南樓喜



得江山助還同汗漫游更煩賢宅相相與發潛幽

戴縣丞機輓詞

小戴久仙去何堪更哭君舊遊驚昨夢陳迹愴遺文晚  
暮期相與死生俄遽分銘成媿贊德揮淚望新墳  
高士終爲簿豈惟勾小稽鸞鳳雖在棘桃李自成蹊官  
府資關決儒流仰品題定知餘慶遠遺愛滿雙谿

方興化叔理輓詞

廟乏著靴鬼夢中言更明起家尤感勵爲吏極廉平薦  
口聲名重朝行去就輕奏篇真確論何日遂施行

鴈塔深論契鵝班試著行參亡聞易簣越弔後除喪支  
郡難留鄧佳城久夢方吁嗟德浮位回施與諸郎

戴迪功應龍輓詞

猶記天街會同爲乳竇游姻家頻會聚親意愈綢繆吉  
德宜多壽奇疴竟不瘳無由見安道汎雪悵同舟  
好學數仍奇躬行家遂肥時將詩自樂晚悟世俱非教  
子惟黃卷高門看綠衣阿連悲未泯無淚爲君揮

王通判琰輓詞

世篤青箱學驂騑更著鞭半山分近派巖壑誦新篇竹



馬迎雙鳥棠陰憶二天黃扉伸讜論風節尙翹然  
才具盡時用拂衣俄去之善藏經世手回施稱家兒  
博延陵恨人琴子敬悲連年事如許天道杳難知

姜鍾離 柄 輓詞

門戶期興起交朋務琢磨反身求大學決意取儒科  
贊府聲尤著鄰封惠亦多傷心濠上路無復聽弦歌  
別去期三載伴來痛一書死生誠大矣力量果何如  
平日真知我遺言苦問予作銘雖不愧回首倍欷歔

顧養直 義剛 輓詞

萬頃東湖下曾門起大家子孫昌世業文字作生涯  
堂後萱猶樹庭中桂欲華惜哉時不待誰忍送悲笳  
舊向君家去宜齋屢舉觴人常誦諸顧里不見他楊身  
世驚春暮湖山愴夕陽園林未成趣鷗鷺亦淒涼

李度支 嘉言 輓詞

忽作堂堂去門前雀已羅夢隨彈指斷事向蓋棺多  
心繫六州鐵身傾千丈坡喑喑晝夜哭奈此敬姜何  
孰匪同升素君子我最親詞章傳自舊翰墨恍猶新  
別去情逾篤歸來迹遽陳無從效經紀悲結淚沾巾



何司業 伯謹 輓詞

頃歲遊孤嶼名門說二何胡為終璧水自合上鑾坡器  
重連城價心澄古井波傳家衣鉢在袞袞並儒科  
骖麟陽司業作州如理家源流知有自悃悞信無華方  
喜亨途遠俄驚暮景斜傷心傾蓋舊何處望東嘉

王遂安 時敘 輓詞

淮水古王氏生平熟義方三珠欣競秀兩桂早聯芳才  
大用何嗇源深流自長青甕傳令子一箭取雙鷁  
問學自冰翁詞章聳巨公不慙循吏傳真有古人風捫

蝨書猶在飛鳧迹遽空人琴悲子敬三讀愴深衷

周左司 韻 輓詞

從政心無愧敢言人所難精忠憂世切清節照人寒交  
臂失持藁乞身終考槃老成今已矣西望淚洸瀾  
乙丑慈恩會今幾六十霜輶車來握節相府記傳觴詩  
藪懷高隱郵筒見短章不堪千里隔丹旄想飛揚

蘇江陰 十能 輓詞

萬卷蟠胸次千篇秀筆端朝行期奮迅賢路竟艱難雖  
號循良守欠為文字官遺編幸無恙留與後人看



珠集 卷五 五丁履謙校

伊昔初傾蓋摛文已甚工親聞南澗語謂有魏公風既  
往言多驗歸來道更窮誨言非教佞後裔報宜豐

魯少卿 昔 輓詞

隸募儀駕綴翛然兩鬢斑時清嗟歲晚遊倦得身閒人

在羲皇上經傳伯仲間桂枝芳未已何止倍燕山 六十年間

登科者  
十人

前輩風流泯靈光獨歸然指困推甲族跪履記丁年有

子傷埋璧惟翁亦蛻蟬功名雖已矣千載尚遺編

陸郎中 沉 輓詞

壯歲聯雙捷衰年困百罹肉身心佛子霜髮貌嬰兒萬

事幾樽酒百年千首詩浮生成夢覺吾道竟何之

從弟忝東牀相從二十霜人琴一何苦冰玉兩俱傷別

久成今昔歸來失老蒼稽陰終反葬西望倍淒涼

梁仲蒼輓詞

延賞高三讓殊科擅一鳴元寶文未極長吉記先成妙

語遺膏馥立談悟死生行人痛埋璧父子若為情

人物如君少相期上石渠博文該四部篤學富三餘淚

盡知無及交深未覺疎何時酌墳草細讀茂陵書



王檢正 同 輓詞二首

到處稱循吏星軺復郡侯威名致降虜恩信感亡牛省  
闈主公議祠庭尋舊游善人天不慙愁絕峴湖秋  
客授蒙傾蓋朝參喜綴班開藩才一水去國遂千山晚  
遇名方重言歸鬢未斑功名付諸子含笑謝塵寰

彭宣義 汝知子復之父 輓詞

種德不在大至誠天所親但能存一念何用活千人經  
筭儒風遠香山句法新功名付兒輩不必在吾身  
籍甚清湘守修名所在聞宦途資畏友家訓仰嚴君歸

路飛丹旆長空慘白雲生芻不成奠揮涕想江濱

朱婺州 安國 輓詞

治行古循吏風稜真諫官鋤姦清遠徼持重息羣謹久  
弄趙堯印重彈貢禹冠去天纔尺五惜不見長安

莫銅陵 堂 輓詞

經學高餘子躬行慕古人儒風三葉秀和氣一門春台  
嶺漸摩久銅官撫字均庠東亡二老凝望淚沾巾

張泰州 禮本 輓詞

燕趙多奇士如公名不虛胸中九域志筆底百家書報



國心尤壯籌邊智有餘功名竟齋恨西望倍歎歎

徐季節輓詞

公府推徐穉山陽薦仲車盛時遺此老沒世竟窮廬行道嗟無命傳家幸有書魯山終不識撫卷倍歎歎

周德遠輓詞

家世傳儒業鄉邦聳義風將迎無倦色交友盡名公太學飛聲早浮生轉首空怡如堂下月猶照紫荆叢汝能之兄

余永彥輓詞

戶外諸生屨門前長者車柳袍空自染瓶粟竟無儲隱

行刑宗黨清風照里閭沈冥誰為表賴有子雲書

李堯卿唐佐輓詞

里社久相從知君陰有功救人多藥喜持論恥雷同素業諸郎在浮生一夢空淒涼宋清傳健筆媿河東

方運使有開輓詞

聖主一見決孤忠自致身籌邊滿軀膽處事掇皮真氣直老彌壯言高用未伸留屯十二事公論付淮民

王觀國觀輓詞

晚識三珠樹方知獨笑翁舊游虧半面遺恨想高風小



楷墨猶濕殘膏澤未窮梅花縞寒夜埋璧衆香中

沈朝奉

雲章宜之之父輓詞

相業富青箱丁年稔義方生兒有如此與世遂相忘終  
老三牲養凌晨一炷香浮休了無恨流慶尙深長

孫子才輓詞

身後名何用人亡意愈深蓋棺悲昨夢掛劍答初心潛  
德仍能發遺言尙可尋悼元情更切接隴柏森森

潘安仁懷

舊賦旣興慕于戴侯亦悼元而哀嗣墳纍纍以接隴柏森森以攢植元謂道元楊戴侯之子也

梁運使輓詞

風月詩千首烟霞宅一區三年著朝蹟一節儉亨途南  
海瞻遺堞西門破老巫才高不盡用無地寄長吁

翁府君輓詞

骭髀翁夫子高才際不施牀頭癡叔易夢裏阿連詩德  
喪嗟何及天胡弗憇遺清風終未泯吹折謝庭芝

徐府君輓詞

孺子人如玉功名不在身死生齊物外孝友篤天倫已  
有傳家子曾充觀國賓他年芳五桂傷不見靈椿

魏監丞

叔玠輓詞



元老餘風烈優游挹美官朝行喜銀艾鄰好許金蘭醫  
謾肱三折生惟指一彈難兄秋夜感風雨舊盟寒

族兄道州輓詞

出守春陵遠相思瀟水深精神雖滿腹撫字亦勞心人  
去成千古書來失萬金懷哉季公諾已矣漢碑陰

周太博汝能輓詞

雨漲雙溪水風高五柳堂論交成莫逆撫事祗堪傷訪  
雪無回權面山空夕陽亂鶯穿綠樹誰復為傳觴

寧海駱君季友輓詞

古易人皆學惟君志益堅研朱滴秋露讀簡斷韋編空  
谷甘無用佳兒尚有傳清風誰得似竹滿臥牀前

臧温叟春卿輓詞

白首行逾恭鄉評敬此翁心開上池水氣襲舞雩風禮  
貌諸公厚聲華一瞬空臧孫知有後三世著陰功

陸宣城梓輓詞

奕世承家學諸公薦吏能政傳花縣美心與練江澄易  
簣去何速攀轅悲不勝傷哉羸博葬淚盡老延陵

寧海劉君次阜輓詞



不識紫芝眉空傳有道碑義方真可法閭室肯容欺未  
覺山川改深明晝夜知薤歌慙不稱冢子素能詩

宋南雄 俊 輓詞

二宋久云遠遺風君庶幾才華試文戰政譽藹王畿梅  
嶺方騰最雪谿俄賦歸情親今已矣老淚不勝揮

莫子執 珪 輓詞

樂有父兄賢談經絳帳前桂林孤素志芹泮老遺編小  
阮情何切童烏業未傳棹閒最崇篤口口話齊年

繆伯恭輓詞

我實由汪出垂髫托外門非惟拜先德猶及見新婚謹  
厚推鄉曲恩慈篤弟昆善人今已矣餘慶在兒孫

吳通判輓詞

一死交情見鄉評重此翁素車奔夕夢繡被落天風身  
任朋僚責心忘尺寸功毋書卓行傳非介亦非通

趙縣丞 彥棠 輓詞

玉立佳公子哦松始戍瓜拳拳飭邊瑣寸寸畫江沙慷  
慨志憂國清修僧在家送行詩尚濕身世遽空華

石通直 莊問純 度之父 輓詞



籍甚新昌族真成萬石家源流端有自悃愾更無華奉  
職冰同潔持身璧不瑕慶門傳未艾蘭玉茁新芽

胡監嶽 祇教 輓詞

賦就八叉手文高三折肱青衫雙鬢雪黃卷短檠燈夢  
斷采芹水神淒下馬陵諸郎追五桂洗眼看飛騰

趙司戶 秀夫 輓詞

奕奕佳公子詞場早策勲願爲新進士終屈病參軍舊  
事成清夢高標想斷雲傷心桑落酒無復到孤墳

端明殿學士王公 希呂 輓詞

片言寤主上亨途幾向專城佩左魚羊陸遐衝雖坐折  
高文宿憤竟誰攄平時屢草千言奏垂絕猶騰八難書  
漢殿履聲今已矣兩州遺老倍欷歔  
短檠鐵硯用功深萬卷蟠胸不輟吟故國遁身來濟岱  
壯年發藻向儒林愛民利物平生事憂國忘家一片心  
史館頃年陪潤色挽公無路涕盈襟

陳文恭公 康伯 輓詞

唐虞千載道重光奕奕元臣任贊襄謝傳風流冠江左  
晉公威譽比汾陽折衝曾不勞聲色輔政惟先振紀綱



天意高高誰可問坐令邦國歎云亡

德量汪汪萬頃陂直將去就佩安危干戈雖在相尋日  
休沐宛如無事時奏罷未聞宮漏轉歸來俄見哲人萎  
哀榮終始誰能及百世旌忠頌德碑

王修撰輓詞

十載頻褰刺史帷名卿風裁映紳綬慶門共仰聯三鳳  
禁路咸嗟欠一夔神武衣冠終遂志平泉花木總成詩  
傷心積翠樓前月斜入欄杆欲向誰

賤子何能直一錢夫君子我獨知憐樽罍談笑幾侵夜

琴劒周旋不記年此去空懸徐孺榻重來無復孝廉船  
百身願贖嗟何及哀涕霑襟如迸泉

何內翰輓詞

豪奪錦標天下聞慨然有志整乾坤諫坡論事言皆合  
帝幄談經道益尊千古高文在菴禁一時名士上龍門  
經綸未究身先死痛惜誰能作九原

潘大卿輓詞

直上青雲不作難壯年何事掛衣冠功名已矣乖時望  
風節翹然見歲寒鴻去冥冥矰不到蝶飛栩栩夢驚殘



傷心耆老今無有留得遺編向後看

張運使 孝仲 輓詞

惠周劔外與淮南歸臥空山且避讒宴坐幾年期不死  
臨行一著信非凡不應杜叟求高閣真使謝鯤居石巖  
欲向西陵尋宿草秋風何日送歸帆

魏郎中 熊夢 輓詞

相公鐘鼎蔽詩聲鯉也聞詩蚤得名高隱碧谿心更遠  
今遊湘浦句尤清握蘭未足酬吾志攬轡寧知老此行  
今日哭君誰最切山房門下老門生

姜祕監 師仲 輓詞

文筆無勞巧剪裁一時妙斲冠蘭臺王楊仕宦曾相接  
游夏淵源有自來治獄心知有陰德立朝人歎有餘才  
功名回施與孫子公亦何為不豫哉  
久聞政績最淮肥鄧嶺循良親見之梓里尙遺前日愛  
棠陰還長舊年枝釣璜方兆非熊卜曳杖俄興梁木悲  
千里佳城空望斷他時歸哭峴山碑

李公執輓詞

乃翁志欲臥煙霞宅枕清江欲泛槎心地共知容渤海



夢魂曾不到京華伯魚久矣聞賢訓魏子端能起外家  
彌望三江梁下水隴西德澤信無涯

未甘辛苦去朝天故作逍遙陸地仙老子平生萬事足  
人間五福一身全麻看日月同奔驥擺脫塵凡等蛻蟬  
重到江頭人不見曉風吹淚忽潸然

莫將仕 隨 輓詞

自歎清才久陸沈晚從內典用工深諦觀炯炯死生際  
寧復紛紛利祿心載酒今誰問奇字遺經古亦勝黃金  
十年契闊遠如許老淚臨風自不禁

樊運使

光遠

輓詞 代人

妙齡便有老成風孝友丹心天與通師友淵源得西洛  
文章聲價冠南宮固知夫子才難用猶喜先生道不窮  
他日鳳泉山下路幾人下馬拜塋中

樊侯勲德佐中興百世兒孫尚典刑闔境民蘇御史兩  
列城人仰使君星憲臺嚴冷獨裁牙道院清閒誰掣鈴  
謠頌洋洋在人耳不須樂石更刊銘

戴縣丞 樟 輓詞

蚤歲鄉書薦弟兄羨君再舉上青冥藍田方欲新漫壁



處士寧知卻應星忍向伯高將束帛誰從小戴授遺經  
佳城得卜真前定忍看一翁衰淚零

伍主簿

景善

輓詞

好賢元不減緇衣客到公家如所歸二浙聲名三鶚薦  
四山風物一翬飛桑榆冉冉身先蛻蘭玉森森家正肥  
人有百身寧可贖發棠誰復濟齊饑  
由來風誼獨穹然坐享家肥不計年墮憤何妨分百萬  
指囷寧復問三千靈椿老矣仁宜壽玉樹種成身已仙  
袞袞公侯殊未已正應含笑入重泉

晚年朋舊益凋零歎絕斯人莫兩楹不忍銜悲讀佳傳  
可堪回首念平生交情君獨全終始人物誰能繼老成  
清些楚魂招不得朔風凄切淚縱橫

安恭皇后輓詞

天作周文合禕揄禮可觀屢陪金輦幸幾奉玉卮歡吳  
女簪新柰梁房掩舊蘭春深蠶事起誰復上桑壇  
鬱鬱南山路傷心鳳翼紅哀歌妻薤露秘殿掩椒風故  
劍恩雖厚中璫事已空但餘彤史筆內傳紀陰功

又代人作



玉勝標祥兆禕衣配至尊柔儀高馬鄧盛德邁娥嬈鸞  
掖空陳迹霓軒服厚思傷心臨七夕素柰已花繁

圖史懷規鑿篇章妙翦裁承歡方秘殿委化已泉臺幽  
壤湖濱秀清笳日暮哀未央當月望不見翟車來

齊國夫人曹氏

趙知宗之母

輓詞

痛哭王孫去南來萬里餘解衣催艇子扶杖擁籃輿已

矣空鸞鏡誰歟得鴈書辛勤立門戶地下勿歛歔

宗子今曾子夫人古敬姜邛邾承孝養浯水刻恩章湯

沐封逾寵芝蘭晚更芳九齡天報遠餘慶尚流光

齊安郡夫人金氏

趙左司公碩之室

輓詞

避地供湯餅當筵接縞衣倉皇奉神版巖險遜征驂遇  
事智尤敏相夫家寢肥考終無可憾蝶夢遶芳菲

五子俱英發尤知仲氏賢勤明真世濟廉儉信家傳別  
乘徑爲郡高城欲捍邊版輿俄棄養事業待他年

太淑人葉氏

單侍郎妻之母

輓詞

婦職躬蘋澗芳年誓柏舟壺儀全肅睦梵行極清修貝  
葉開空性神筮豁病眸飄然指歸路淨觀日西流

爲國生賢子三遷備母慈版輿崇色養從橐勉論思戲



舞老萊子平反雋不疑孝心天罔極腸斷蓼莪詩

太令人趙氏 王帥柎之母 輓詞

令德比鳴鳩芳年誓柏舟承歡猶有戀曠達了無憂方  
奉平反笑俄成汗漫遊哀榮誰得似同穴樂哉丘  
姻婭託三槐同朝得往來迎春煩設席舉壽荷攜杯京  
尹俄遭難都人亦助哀琅琅垂絕語烈婦信高哉

從姑太令人輓詞

伯祖八賢女惟姑壽且康又聞歌薤露誰復是靈光采  
藻空南澗生萱愴北堂平生好心地持以遺諸郎

太恭人劉氏 王台州之母 輓詞

籍甚成天助薰然藹婦容家肥身愈約福備禮彌恭上  
壽九開帙湛恩四受封何人紀遺德女婿正乘龍  
衛氏一見足他人總不如一麾欣義檄千騎擁潘輿台  
嶽傷歸旄青山滿送車佳城流慶遠旁可萬家居

太令人軒氏 趙山甫母自號覺菴居士 輓詞

緣斷身先隱年侵鬢未華死生猶曉夢富貴更空花佛  
祖親提印兒孫競起家無因拜靈几一奠趙州茶  
舊說蘇無著夫人亦正宗毒蛇橫在路栗棘更無蹤



贊臨濟宗旨云一條毒蛇橫在路上覺  
菴云栗棘蓬栗棘蓬一口吞卻更無蹤  
蕭散超塵界扶  
持禮紺容覺庵誰嗣法別去德雲峰

太孺人蔣氏輓詞

之死靡他志天乎不諒人  
菱孤蓬在首艱苦棘成薪  
晚福容千指心空滅六塵  
平生貞烈意終作坐忘身  
潤屋惟純儉居然法度循  
松楸先壟下風月舊湖濱  
子婦皆知孝孫曾亦可人  
浦江如可贖真欲百其身

孺人陳氏

周子及之母輓詞

教子推陶母相望百代前  
詩書經口授名節誦家傳  
藝

苑高鴻筆忠言徹細氈源流知有自何止父兄賢

令子齊年好相從識壺儀蕭生結綬日孟母卜鄰時未

卜升堂拜俄聞陟此悲天涯致芻束淚落薤歌辭

太淑人管氏輓詞

彤史久不作誰能有婦功  
寧知貴家子乃有昔人風  
鉅軸恩何渥芝庭澤不窮  
死生無可憾況已悟真空

陳夫人

程吏部之母輓詞

作配知名士周旋內則篤  
宜家兼四德訓子見三遷  
就養榮方逮歸寧病忽纏  
慶源流未已佳兆得牛眠



張夫人 余元老之母 輓詞

婦德天然備肥家五十年平生勤內則晚歲識真詮  
倒屣非徼福翻經亦應緣于門有孫子佳氣藹新阡

王夫人 羅尚書外祖母 輓詞

婦德勝賢士婺居成大家陰功宜有後餘慶尚無涯  
楊暉出司馬陶潛傳孟嘉文昌紀遺範外氏倍增華

恭人強氏 曾南仲之母 輓詞

祠部源流遠來嬪曲阜孫事夫終婦道訓子大吾門  
頌誥恩光渥升堂笑語溫相期送丹旄馬鬣近周原

恭人董氏 劉侍郎穎之母 輓詞

敬簪尊夫子升堂乳阿姑鄉評推至行家慶展新圖半  
世悲鸞舞高年樂鳳雛賓章應未艾卿月應階符

鹿夫人 同年應尉振之母 輓詞

內外言無間初終志不移白頭供婦職彤管著賢規  
慶衍珠三樹芳先桂一枝鳳岑歸去路含笑不應悲

篤神應勞風高家愈肥新傳快女壻亦復掛冠歸  
慶霽疏封日姑慈不忍違人方後君賜我獨避恩輝孝

旌表門閭安人陳氏輓詞



婦德高千古鄉評徹九重柏舟終自誓石窠啓新封孫  
子傳清白閨門慕肅雍死生無憾處了不媿三從

族姓朱陳盛夫人事愈明老姑俱上壽難弟各清名詹事  
良翰之姊節行輝彤管門闈照赤城室鄰方有託何忍送銘

旌

盧夫人輓詞

名族著岡頭武岡邃幽閨女教修良人驚夢蝶衆子慕

桑鳩物化了難問壺儀誰爲收于公有佳兆袞袞看公

侯

百四從妹輓詞

姊妹二十四凋零餘二人他鄉忽傳訃老子倍傷神已

歎嫠居久何堪逆境頻佳城千里外西望淚沾巾

孝養全終始真成乳阿姑衾裯長夜共甘毳四時須衆

子俱傳業諸孫足自娛吾家女兄弟似此亦幾無

去歲桐川弟新從姊處歸備言家慶事猶著嫁時衣尙

欲尋松社寧堪哭素幃人生真一夢回首事皆非

令人王氏表兄陳左史之室輓詞

嫁早仍知孝夫賢自不貧事姑如事母憂物勝憂身鳳



誥恩榮渥鳩桑德意均孺哀聲不絕淚柏不成春  
宦達方資助家肥忽悼亡一區終異室千載尚高岡奉  
倩神猶慘安仁鬢欲蒼黃昏愁絕處誰伴紫微郎

宜人楊氏 鄭華文之室 輓詞

里閨依楊氏年家託鄭門升堂從壯歲擇壻得賢孫婦  
德儀中盡陰功燕後昆尤憐吾女子流涕說慈尊  
夢入枌榆社心游水竹灣句歸期拜壽近侍望承顏一  
昨聞微恙寧知竟大還佳城無路到夫婦淚俱潛

陳夫人輓詞

族姓甲休陽夫人懿範彰奇男已南省快壻更東牀珍  
錫人加嘆佳城神所藏平生陰德在餘慶尚難量  
雅有幽閒操來嬪清白家相夫全禮敬見子致清華方  
享承軒樂俄興陟屺嗟誰將彤史紀大筆為雄誇

碩人居氏 蔡尚書之室 輓詞

頃侍尚書坐曾聞闈助賢晤言成勇退裏謁戒私專夢  
斷松江路神傷薤露篇悼亡千里淚疊嶂想新阡 蕪子平江

王夫人 周子及之室 輓詞

閨內誰無助夫人事特明傾囊資色養勉學就清名遜



世期高節辭風歎落英丁寧猶在耳伉儷若為情  
荆國風流遠幽閨女教循鶴原驚逝水鶴髮倍沾巾厚  
夜招香魄英詞列翠珉祗愁書字拙貽笑衛夫人

王夫人

陳少南之室

輓詞

淑質依名士身期百不憂藁砧家萬里蓬首日三秋陶  
母傳遺業嵇孤託舊遊幽原誦詩傳無媿柏為舟

王夷仲夫人輓詞

彤史無人續誰能識壹儀蘋蘩奉先祖詩禮付佳兒未  
見魚軒樂俄興鸞鏡悲藁砧方得路腸斷悼亡詩

盛夫人輓詞

婉孌閨中秀清高林下風相夫能盡禮教子使移忠邊  
郡官無曠都城養得終壹儀今具在流慶復何窮

恭人胡氏

陳奉直千能之室

輓詞

懿行表閨房情親共盡傷繡衣來宅相彤管著銘章  
劉舉誠之為作銘蘋澗誰供祀藁砧空悼亡之蘭俱秀發所恨失

元方

先喪其長子

宜人聞人氏

趙婺州之室

輓詞

四郡歌賢牧魚軒從隼旗深閨無裏謁色養謹安輿故



里稱家法諸郎讀父書美哉彤史筆三誦為歆歔

宜人史氏輓詞

闕閔冠三朝尊公兩珥貂夫賢能盡禮家貴肯期驕教  
子門風振澄神性地超悼亡無可憾直筆付孫樵

安人鄭氏輓詞

勤儉佐家肥猶齊舉案眉錦封俱被寵鸞鑑可勝悲謝  
砌森羣玉邳林先一枝木華文雋麗銘德粲堂碑木簷專為

孀人錢氏丞相之女適曹氏輓詞

家世戟如林來嬪藹德音功容俱可度疾疹遽相侵已  
矣空蘋澗誰歎助藥砧佳兒隨玉折尤切悼亡心

孀人林氏盧彥德之室輓詞

家世甘泉舊幽閨有令名賢明教陶侃勤苦佐淵明蘋  
澗今何處鳩桑空復情誰知悼亡意揮涕望佳城

孀人曾氏葉寺正之室輓詞

婉孌應眉壽天胡弗與齡情深孫楚詠淚盡女孥銘蘋  
藻空南澗芝蘭有謝庭越山埋壁處秋雨濕銘旌

信國夫人秦氏林子長之母輓詞



夫人富貴出懷紉擇配和鳴得仲卿鸞誥早能封大國  
魚軒不及伴雙旌肥家得法晚無倦教子登科新有聲  
歎息南谿未成屋鳳凰山下啓佳城

茅夫人

鄭貴虛之母

輓詞

清心玉映許誰同更有飄飄林下風政爾高情協宗老  
故宜嘉遯樂龐公遠謀蚤識身為重晚境還知性亦空  
已擬張林碑婦德合歸彤史巨編中

孺人陳氏輓詞

追憶宮端舊典刑三貞況復是難兄豈惟門戶生光彩

直使朝廷列姓名煙海乘桴誰可奪天風反火報尤明  
雖云弟娣相從去自有英靈凜若生

太碩人潘氏

葉尚書翥之母輓詞

玉映清心著壺儀閨房賓敬到齊眉豈惟山水協高趣


宗少文每遊山水往輒志歸妻羅氏亦有高情與少文協趣

更爲國家生好兒太宗賜張

文定齊賢母詔曰婆婆布福生得好兒爲國家分憂萬口共推諸福備八旬猶負  
一年期伯仁冬日應腸斷不見堂前舉酒時



攻媿集卷十四



攻媿集卷十五

表牋

宋

樓

鑰

撰

請舉樂

皇帝第一表

春秋重改元法蓋先于五始君子不為樂古無越于三

年請為王言冀同民樂中謝恭惟皇帝陛下系隆列聖

娛侍三宮綿宇屬心既極謳歌之戴重華盡孝適承邊

密之餘顧烈祖之報厚且重焉然文孫之制期已久矣



況復高廟卽安于神御壽皇俯和于祥琴下逮都人悉  
除樂禁新王春而建號進寶冊以歸尊願飭攸司各揚  
乃職鏘八音而應律肅萬舞以充庭仰奉重親益見慈  
顏之喜下孚衆聽普臻和氣之祥

擬第二表

睿主承休光啓太平之運王正肇始益新治世之音爰  
伸百辟之誠未動九重之聽游陳奏牘進冒宸旒中謝  
恭惟皇帝陛下仰紹心傳率循家法念德壽詒謀之重  
體重華盡孝之勤旣居崇高富貴之尊未聞文采節奏

之美聲音不足于耳豈爲是哉禮樂不可去身有爲貴  
者雖聖帝尚深于餘慕而禮經尤務于適中莫先鳳歷  
之頒宜上龍樓之奏豈止君臣相悅第成徵角之詩將  
與天地同流益致形聲之應

至尊壽皇聖帝第一表

高蹈萬乘聿重協帝之華躬行三年曲盡慕親之孝矧  
將陳于冊寶盍備舉于樂章爰率具寮仰干淵聽中謝  
恭惟至尊壽皇聖帝陛下怡神于淡游物之初惟付託  
之得人宜燕頤而養性方且羹牆在念疏素以居旣已



光舜禹之傳乃親爲曾閔之行期可已矣必欲加隆祥  
而廓然尚云寧戚顧平時不好世俗之樂豈今日忍聞  
堂上之歌然而和琴俯就于成聲鑽燧再經于改火不  
應慈極尚遏諧音伏望酌先王制禮之中念聖子承顏  
之養居處笑語寢寬追遠之思鐘鼓筦絃益致導和之  
美

第二表

三年執禮已經徙月之期五日受朝當備鈞天之奏援  
彝章而有請闕俞旨而未頒事恐久稽義須再瀆

中謝

竊以帝舜旣命大禹猶欲六律五聲之聞漢皇上壽未  
央亦以萬歲大笑爲樂蓋已膺天下之養盍具舉朝廷  
之儀若稽舊章允屬盛際恭惟至尊壽皇聖帝陛下道  
高物表德邁古先旣全與子之明尤盡因心之孝謂太  
宗就簡遽爲三十六日之期而晉武欲爲莫起數百餘  
年之陋出于獨斷高掩前聞羣臣仰體夫聖心薦歲忍  
形于奏牘迨茲卽吉乃敢發端旣已遏音于三載之餘  
正當成歌于十月之後況卜元正之吉將新徽號之隆  
儻非廣奏于和聲何以崇成于縉典恭聞南內將騰聽



樂之章欽想東朝亦望承顏之樂仰祈睿旨俯徇輿情

擬第三表

洵貢封章祈舉九成之奏未承詔命敢稽三請之勤中

謝恭惟至尊壽皇聖帝陛下高視帝尊共為子道自畢

因山之奉已合外除靡從越紉之權竟全終制遠復先

王之法肯循後世之常迨其今兮何以尚此至矣盡矣

願聞大舜之韶皦如繹如當語太師之樂雖欲勿用其

將何辭濟濟羣賢傾聽笙鏞之間欣欣百姓喜聆管籥

之音

擬壽聖皇太后牋

三載邊音已全于中制兩朝就養當備于和聲中謝恭

惟壽聖皇太后殿下德並娥莘行齊任姒佐中興之業

協濟艱難贊內禪之明共安閒燕比驚慈展忽返帝鄉

乃安長樂之居密受重華之養神孫御歷寶冊陳儀豈

應迎年而不為樂琴瑟之友鐘鼓之樂諒未忘儷極之

思羽籥之器繼兆之文願俯徇輿情之請

賀正旦

皇帝表



歲必履端蓋重四時之首年初建號有光二帝之傳矧  
 慶事之鼎來效羣臣之善頌 中賀 恭惟皇帝陛下乾剛  
 行健離照繼明正月之吉始和春祺既集四海之內咸  
 仰王化方行當周家布政之時迺漢歷改元之日喜瞻  
 萬乘上寶冊于三宮肅領千官奉玉卮于前殿偕備琚  
 瑀珩璜之飾創聞鐘鼓管籥之音益知嗣德之在初孰  
 謂太平之無象開八荒之壽域登庶俗于春臺臣猥預  
 周行欣逢穀旦方千里者九想同望于堯雲呼萬歲者  
 三敢競伸于虎拜

至尊壽皇聖帝表

歲之朝日之朝方肇新于鳳歷尊之至養之至爰啓慶  
 于龍樓歡動宮闈澤均海宇 中賀 恭惟至尊壽皇聖帝  
 陛下位居慈極仁冒羣生一道心傳六通四闢于帝王  
 之德三登化洽上際下蟠于天地之間乃釋萬幾之繁  
 坐受九重之養惟時上日尤異常年聖子改元著遵制  
 揚功之意昕朝奉冊見歸美報上之誠八音克諧四方  
 來賀豈特履端之可慶誠為曠古之未聞臣等恪謹臆  
 趨伏深釐并顧方訪道于崆峒之上正當儲神于蠖濩



之中何止八千春以大椿而為久敢祝三萬歲願慈母而亦然

賀三宮受冊

皇帝表

乘翠鳳之車講盛儀于元日鏤白玉之牒上徽稱于重親慶事既成綿區交賀中賀恭惟皇帝陛下與天同大如日方中克寬克仁允協成湯之德惟精惟一密承虞舜之傳爰奉三宮之歡以垂萬世之則討論故實備極嵩高視慈福之鴻名皆有願聖人壽之祝侈重華之顯

號尤彰為天子父之尊當遲日之載陽喜積陰之頓解雨師風伯既已肅清乾端坤倪為之呈露雲移天仗首趨漢殿之朝星拱玉皇親下堯階之拜歡聲相和叶氣橫流惟天人順應之甚明知社稷靈長之可卜臣等幸緣際會獲奉周旋快覩聖時允屬紹熙之始願隆孝治一如貞觀之初

壽聖皇太后牋

涓嗣歲之端辰上丕天之大號神孫具禮親來翠蹕之朝聖子承顏同受雕珉之冊中賀恭惟壽聖皇太后殿



下行齊任姒德邁娥莘蚤輔中興之功載碑內禪之策  
 由長秋而登長樂安榮已見于無加自紹興而至紹熙  
 戩穀益知其未艾惟壽居五福之首而聖乃羣倫之先  
 永年常奉夫母儀今日尤嚴于祖后禮容甚盛鼓舞惟  
 均臣等獻歲云初趨班惟謹得少廣之道本無迹之可  
 名居東朝之尊祈後天而難老

壽成皇后牋

萬乘來朝當夏時之上日三宮受冊列文母之不稱覆  
 載兩間歡呼四起中賀恭惟壽成皇后殿下謙恭素稟

柔懿內充奉慈極之天顏曲盡問安之禮佐壽皇之內  
 治克全燕翼之謀禮既備于尊崇心益安于沖淡共都  
 顯號爰歸父母之尊仰嗣徽音尤侈婦姑之盛俱以壽  
 康而嚮用何勞警戒以相成臣等欣際休期獲觀緝典  
 詠思齊之什維周匹休安長樂之居與宋無極

皇后牋

羽蓋翟車陪六飛之法駕瑤編寶刻上三殿之隆名既  
 備盛儀式昭內助中賀恭惟皇后殿下處心淵靜迪德  
 懿恭五日受朝常謹問安之奉九重視膳每言佐餞之



勤迨茲穀旦之禮成想見長秋之喜倍尚須決日嗣舉  
從容堯舜相傳禹方循于一道姜任在上妣宜續于徽  
音臣肅領廷紳預觀國典展宮中之賀諒無異于外朝  
奏堂下之音爰助成于和氣

賀皇后受冊

皇帝表

九重渙號實遵慈展之謨萬乘臨軒爰授中宮之冊肆  
稽故實備著禮容竊以地本法天方著順成之德月惟  
遡日遂參久照之明況居大寶之尊盍正內朝之助天

作之合王假有家中賀恭惟皇帝陛下道貫三才愛均  
四海親承付託之重允資輔佐之賢若時允妃作配龍  
潛之際儼我宸極有開熊夢之占誕布玉音進登椒掖  
贊侍膳問安之孝盡求賢審官之思臣等恪領廷紳預  
聞國典乾坤定矣式符義畫之文鐘鼓樂之願繼周南  
之詠

至尊壽皇聖帝表

神器有傳俾正椒房之號緝儀告備肆頒寶冊之嚴化  
浹綿區慶歸慈辰中賀恭惟至尊壽皇聖帝陛下德參



覆載道極範圍堯治民以治民有光前烈天與子則與子啓佑後人乃當命禹之初首眷嬪虞之舊用修陰教以正人倫鳳蹕來朝副以翟車之盛龍樓問寢加之禕服之華臣等依附末光相成鉅典仰遵睿訓見正家正國之規鞏固皇圖知卜世卜年之久

壽聖皇太后牋

神孫御極蚤正于長秋天仗充庭用揚于顯冊事關宗社歡動宮闈中賀恭惟壽聖皇太后殿下氣毓沖和性資淵靜化行南國正萬世之彝倫尊處東朝受兩宮之

孝養屬涓穀旦首上隆名既先慈福之儀旋講穆清之禮舍飴示愛見寶歷之親傳佐饒得人想慈顏之有喜臣等駿奔在列鼇抃惟均家法相承咸仰德音之嗣母儀有則益觀王化之基

壽成皇后牋

坤柔而剛既參內禪之策婦聽而婉俾正中闈之儀中賀恭惟壽成皇后殿下遡日爲明與天同大贊至尊之孝治一紀于茲安長樂之宴居萬年有永謹二南之正始備四德以相承懿典告成慈幃胥悅侈家國非常之



慶實社稷無疆之休臣等獲際昌明不勝鼓舞友琴瑟而樂鐘鼓莫先儷極之賢本夫婦而始后妃茲實齊家之要

皇后牋

綸翟禕衣久正內廷之禮金寶玉冊式全昭代之儀慶衍宗祚歡同宮掖中賀恭惟皇后殿下肅雍成禮柔靜資生蚤開墜燕之祥允協維熊之夢躬儉節用致君子之家肥順色承顏化天下以婦道爰自御圖之始允資儷極之賢稟命慈皇歲儀穀旦是謂人倫之至益彰女

則之嚴臣等目覩彌文欣逢盛際關雎麟趾既已先正始之基周姜太任當無媿思齊之聖

謝賜春衣表

春日載陽肆頒于命服上恩難報仰謝于皇局列辟同辭闔門受賜中謝恭惟皇帝陛下業隆潤色道廣旃幪大舜之垂衣裳茂以加此神禹之美黼冕吾無間然迺俯念于廷臣仍舉行于時令爰賁以帛俾華其躬視爵秩而有差被寵榮而如一臣等敢不退揣其分思稱所蒙慕召南在位之風期厲羔羊之節效齊國老人之語



請遺天下之衣

賀會慶節表

紹興三年以左史攝西掖侍班扈從有旨百官詣重華宮拜表賤時禮部

郎已在北宮候迎駕左相留公請就殿廬中作今附于此

虹渚發祥爰紀生商之旦龍樓啓慶敢伸戴舜之誠

中

賀恭惟至尊壽皇聖帝陛下游物之初怡神于淡六通


四闢于帝王之德聿成盛治之勲上際下蟠于天地之

間罔匪春和之氣徧寰區而蒙福與太極以同功禮奉

玉卮遠循漢殿之制書陳金鑑何待唐臣之言臣等肅


頌鵷行恭舒虎拜祝南山之萬壽睿算無疆效嵩岳之

三呼歡聲旁洽





攻媿集卷十五



攻媿集卷十六

表牋

宋

樓

鑰

撰

謝温州到任表

起家爲郡俄及成時便道之官已共侯度戴睿恩而甚  
 厚宣德意以具孚申謝伏念臣一介書生累朝世祿當  
 聖主飛龍之始偶玷末科造明時振鷺之班每安平進  
 久預憲章之筆削屢參史牒之編摩嘗佐治于偏州復  
 勾稽于列寺天府式邦財之重司宗書帝系之繁比終



素鞞之期忽冒朱轡之寄惟此東甌之勝實為左浙之  
 雄頃任冷官茲叨假守山川如故風俗粗諳雖無竹馬  
 之迎頓起蒲鞭之望以前日待諸生之意加惠斯民于  
 此邦揚泮水之波廣為膏澤要令上下俱無所苟且庶  
 幾田里寢銷于歎愁茲蓋伏遇皇帝陛下深軫黎元敷  
 求長吏謂臣存登王國必能弘惻怛之仁念臣四對天  
 顏固無俟丁寧之諭是以左符分畀不待朝參嚴旨趣  
 行免加臨遣幸遂養親之志實勤戀闕之私臣敢不律  
 己奉公平心待物惟忠惟孝誓堅終始之誠濟猛濟寬

務勉中和之政

謝中書舍人表

史筆屢書深慚無補綸闈久假遽命為真嘗控避而弗  
 俞竟周章而就列申謝伏念臣受才譴薄涉世闊疎偶  
 承累葉之儒科寢預清朝之官使往分郡寄何有民庸  
 當壽皇御極之時曾四登于文陛逮聖主臨朝之始遂  
 三入于脩門首汙郎省之聯旋備賢關之式貨泉出納  
 粗謹攸司寶牒纂修伏尋故步晉班左城攝事西垣記  
 注非工有媿螭坳之直詞章至陋始為鳳閣之羞矧執



愚之不移或遇事而輒發妨賢已甚忤物且多方喜懼之交懷恐顛躋之未免力求引退敢覬褒升才思欲枯安得湧泉之敏身章增煥更貽濡味之譏茲蓋伏遇皇帝陛下翕受羣言旁招衆俊請臣粗親小伎故使當訓誥之司察臣素稟樸忠或可效涓埃之助攷于詳試有此誤恩臣敢不思稱所蒙益共乃位言惟作命少裨雷風鼓舞之神忠以事君當謹朝夕論思之職

謝壽皇聖帝表

柱史充員久虞幽黜詞臣掌制遽忝超除揣陋質以無

堪望慈宸而知幸

中謝

伏念臣頃叨末第已出異恩再

玷周行惟自安于平進仰承清問嘗屢貢夫愚忠出分海嶠之符入就星曹之列聖作明述親見盛時年除歲遷寢塵清貫書言書動慙無載筆之功如絲如綸徒積代庖之媿將以外庸而自詭乃叨親擢以爲真退省僥逾益增戰栗茲蓋伏遇至尊壽皇聖帝陛下達源繫表探蹟古初齊聖廣淵居域中之有大危微精一爲天下而得人式詒燕翼之謀茲見儲才之效肆令么麀猥預論思臣敢不深念遭逢誓堅操守仰戴兩朝之眷敢務



苟容願殫千慮之愚以伸忠報

謝給事中表

充員詞掖久懼罔功進職瑣闥忽驚誤渥辱訓辭之甚  
寵揣分量以奚堪中謝竊惟封駁之司實關出納之要  
詔敕之布咸仰君相所爲有唐則許塗竄而奏還本朝  
則令詳酌其可否宜求人望以贊政經豈伊妄庸乃與  
詮擇伏念臣迂愚自信執滯不通秉筆螭坳固有慚于  
良史演綸鳳閣曾何取于陳言屬兼直于禁林幸親逢  
夫興運書詔填委靡容晷刻之淹號令流行欲助風雷

之迅僅無乏事安敢辭勞荷簡記于宸衷俾驟膺于夕  
拜不改北門之舊旋仍東觀之華加賁身章增光從橐  
茲蓋伏遇皇帝陛下勵精初政垂意羣才用舍之間初  
無適莫論奏或至不吝改更知臣備歷險夷屢有愛君  
之志謂臣素懷懇直願殫論事之忠遂致孤蹤亦叨隆  
委臣敢不俯思幼學務勉後圖親年益高但有歸耕之  
意主恩未報尚希批勅之風

謝權吏部尚書表

充員瑣闥自顧罔功攝長銓衡忽蒙誤寵仰皇慈之至



渥揣微分以何堪中謝竊以選部持衡夙號六卿之長  
 文昌聽履實為八座之聯非素推公方不足以杞吏姦  
 非妙有德望不足以壓輿論雖黃散之下無忝異同而  
 搢紳之流鮮不關繫宜求精敏之彥以當要劇之司伏  
 念臣才不逮人學徒泥古一為支郡三入脩門久侍上  
 皇愧愚忠之無補親逢嗣聖荷褒擢之有加代言非陸  
 贄之工批勅謝李藩之器俯徇芻蕘之論屢寬鈇鉞之  
 誅去省眼者五年遂躡登于冢宰離班心者一載遽首  
 列于後臣禁林兼內制之文史館涉信書之筆滿盈已

甚控避莫回頒御府之襲衣益之鞶帶駕天閑之良馬  
 覆以雕鞏但喜悅親之私敢云稽古之效茲蓋伏遇皇  
 帝陛下多能天縱盛德日新蒐舉異才踵登持橐之選  
 優容棄物獨負吹竽之慙宜黜而遷以榮為懼臣敢不  
 深思僥冒勉竭疲庸為山公啓事之書知非所及守崔  
 亮停年之格何足言勞尚幾典選之平少助官人之道

謝兼侍讀表

升班文部方虞典選之難進讀露門更辱兼官之寵循  
 牆莫避據蒞是憂中謝竊以帝王之興必以學問為急



如懷素元量之選本爲覽史之資由宋綬夏竦以來始  
有讀書之職仰惟睿聖光緒炎圖首開講帷詳延從橐  
攷邇英之舊加賜坐以甚優于共膳之餘俾侍言而更  
入首閱三朝之寶訓次觀先正之奏篇宜求鴻博之儒  
以助緝熙之學如臣至陋涉世多艱豈期累歲之推遷  
寔歷明時之華要詞垣翰苑代王者之敷言史觀經筵  
極書生之榮遇況從夕拜擢置天官朝入君門方被宸  
綸之渥暮歸私室又驚渙汗之頒是何遭逢有此僥冒  
茲蓋伏遇皇帝陛下勵精庶政垂意多聞廣廈細旃許

奉清閒之宴衰衣博帶不違咫尺之顏自古所稀于今  
獨盛猥令未至躡冠羣賢臣敢不紬繹舊章勉圖微效  
海涵天覆或容草芥之忠日往月來庶有毫釐之補

謝顯謨閣直學士知婺州表

典選無聞方上便親之請承流已試載叨出守之行寵  
躋延閣之班增賁輔藩之寄祇膺明命倍激危衷

中謝

伏念臣奮迹孤單逢時休盛昨自東嘉之收召尋登左  
省以推遷代言慙潤色之工封詔乏塗歸之效及夫紬  
書視草勸講掄材皆儒者之至榮豈生平之敢望養誤



恩而踰分致私室之挺災重貽慈母之憂益動故鄉之  
念力祈閒退仰賴矜從侯邦分寶婺之區學士寓文謨  
之直繇常伯而出于故事或有此除攷公論之歸在小  
臣恐非所稱莫遂循牆之避徒深戀闕之誠茲蓋恭遇  
皇帝陛下覆育羣生敷求長吏察臣昔當一郡拊摩羸  
竭于微勞念臣今歷三朝進退欲全夫素守俾司乃牧  
俯便其私臣敢不欽服訓詞益思砥礪五百里曰旬不  
違咫尺之威二千石惟良少展涓埃之報

謝中大夫表

由選部以守藩方陳嗣請因年勞而進秩更沐綸言祇  
拜以還感銘何極中謝伏念臣生逢聖主世受國恩雖  
歷仕累朝幸相繼百年之外而傳家三葉俱弗踰六品  
之階敢期後嗣之微乃越先臣之舊共承遺訓未知聞  
詩聞禮之言追仰前蹤徒有慙長慙卿之謂豈特一門  
之幸實爲千載之逢茲蓋伏遇皇帝陛下優待臣工仍  
嚴銓法三年攷績旣容賞典之參一體疏榮爰示禁途  
之寵臣敢不激昂素守銜戴隆知漢議方興媿乏倪寬  
之對淮陽旣遠敢忘汲黯之忠



謝提舉江州太平興國宮表

分共理之符敢起一麾之嘆廩祝釐之祿終俞三請之  
 辭盡出上恩獲伸素志中謝伏念臣稟資至陋涉世最  
 疎誤蒙三聖之知寢躡六官之長輟金華之講而為金  
 華之守曲從外補之求由學士之直而寓學士之班仍  
 冒親除之渥已過家而上冢將叱馭以登途屬以母老  
 易危暑行致疾羣醫俱試百口相驚亟上需章謂必嬰  
 夫嚴譴首班溫詔乃許緩于官期感泣之深憂惶實切  
 率更旬浹又露忱衷特寬方命之誅竟允奉祠之願仰

隆私之過厚誠近代之所無去魯行遲難效齊邦之接  
 浙報劉日短幸容李密之陳情茲蓋伏遇皇帝陛下仁  
 本愛人孝先錫類凡加識拔舉無簪履之遺苟有懇祈  
 俯詢芻蕘之賤使退安于貞館得娛侍于慈闈臣敢不  
 銘著肺肝躬陳菽水況此塵勞之久少休疲曳之餘凱  
 風自南獲遂奉親之樂眾星共北誓堅報主之心

賀重明節表慶元元年

述者明作者聖方兼備于孝慈一曰壽二曰康宜大來  
 于瑞慶茲逢誕節倍激忱衷中賀恭惟太上皇帝陛下



玩道希夷儲神蠖濩尊居特室成三朝脫屣之高坐闕  
 皇齡受萬歲奉卮之養功隆太極事越古初當今賓鴈  
 之時際此流虹之日慶綿宗社歡動宮闈臣久玷從班  
 適叨外補天街簇仗莫陪豹尾之中海嶠傾葵仰望龍  
 樓之表

賀瑞慶節表

神筴紀元方懋繼承之烈流虹啟瑞載逢震夙之期凡  
 屬照臨率均抃舞中賀恭惟皇帝陛下聰明冠古歷數  
 在躬纂列聖之不圖謹三宮之色養益仰守成之美日

聞典學之勤良月就盈爰輯大來之慶後天難老坐隆  
 不拔之基臣竊食祠宮馳神天陛修救水之敬既諧穎  
 谷之私奉香火之緣敢效華封之祝

謝再任宮觀表

祠庭既廩其命維新敕牒臨門從天而下恍不知其何  
 自稟欲受以猶驚仰惟異恩敢不祇拜中謝伏念臣才  
 非適用學不知方幸逢熙洽之朝寢冒清華之選四載  
 預論思之列無補毫釐平時于出處之間靡分尋尺始  
 因請外亟昇輔邦旋以便親力求貞館塵瀆蓋高之聽



俱蒙從欲之仁繼辱簡知再叨共理不圖出守乃復一  
 麾來者猶可追惟闔門而退省觀其所以養敢謀食以  
 自營重尋香火之緣盡出晷旒之眷惟廬阜棲真之勝  
 自熙陵紀年而來竊祝釐之虛名得與釜之實惠喜同  
 毛檄歡動萊衣茲蓋伏遇皇帝陛下覆載無私照臨不  
 顯選擇紳之髦士咸與明揚念簪橐之舊臣未嘗終棄  
 賦以斗升之奉增以儋石之儲臣敢不益體洪私誓堅  
 晚節為子華之母而請粟寧待人言班周室之祿以代  
 耕實銜君賜

賀皇子降誕

皇帝表

天啓昌期方侈三宮之慶國生元嗣實隆億載之基温  
 詔四馳驩聲一律中賀竊以本朝之傳列聖古所未聞  
 長嫡之出中闈今方再見况五世高曾之上壽當三朝  
 揖遜之盛時首開長發之祥益茂無疆之祉恭惟皇帝  
 陛下仁霑動植德冒華戎堯帝聰明既親于九族周家  
 忠厚宜見于百男爰稽熊夢之占允協燕禴之吉事關  
 宗社喜浹穹祇臣頃玷從臣幸休真館拜殿陞之名表



莫綴駕班誦朝廷之德音敢同鼇抃

太上皇帝表

尊居慈展方均萬國之歡慶篤神孫益衍四朝之盛宮  
闡喜溢海宇恩深中賀竊以漢甘露中嘗有甲觀命名  
之愛唐開元際亦稱三日臨澡之儀曾未有視黃屋以  
非心見綠車之載育恭想天顏之悅咸欣帝系之昌恭  
惟尊號太上皇帝陛下道體純乾功參太極傳神器而  
與子為天下而得人仁聲素洽于編民福祚遂綿于世  
嫡克岐克嶷含飴自適于聖情曰壽曰康戲綵愈隆于

色養臣曾從屬車之後遙瞻特室之嚴奏未央五日之  
朝阻陪下列效嵩岳三呼之祝徒罄微衷

太皇太后賤

慈尊無上方歌眉壽之隆慶系有傳及見耳孫之育古

今創觀中外均歡中賀恭惟尊號太皇太后殿下化始

周南德同坤厚翊中興之運母儀坐閱于三朝濬長發

之祥帝統通觀于五世備壽富康寧之福形覃訐岐嶷

之歌仰推毓夏之原是啓生商之瑞臣叨塵禁路退奉

祠庭春而秋秋而春孰計後天之算子又孫孫又子益



延過歷之期

皇太后賤

居壽慈之宮仰尊祖后歌震風之雅誕育曾孫茲振古  
 之未聞亦本朝之初覩中賀恭惟尊號皇太后殿下德  
 先恭儉性本仁明親見堯舜禹之傳共循一道上有姜  
 任妣之聖宜致百男果慶中闈遂生元子惟天心之眷  
 佑成國勢之安彊臣祇奉真祠阻陪賀版本支百世方  
 欣五世之同堂壽考萬年坐看卜年之過歷

太上皇后賤

思齊文母媿慈極以俱尊於赫湯孫由中闈而載育仙  
 源有自聖統其昌中賀恭惟尊號太上皇后殿下德茂  
 塗山禮隆渭涑上皇與子贊成脫屣之高聖主奉親倍  
 喜含飴之樂當漢觀命名之始想唐宮臨澡之同四方  
 流聞萬口交賀臣嘗叨持橐退獲奉祠移壽康之班莫  
 預千官之末衍雲來之慶更綿百世之期

皇后賤

位正柔坤將行冊禮祥開滄震首得天材上承列聖之  
 休益侈重闈之慶中賀恭惟皇后殿下傳勲闕德應



帝姻帶弓鞬于祿前允協燕祠之瑞設桑弧于門左果  
 符熊夢之占三宮喜嫡長之昌萬乘啓元良之正稽前  
 朝而嘗見在今日以增光臣退處衡門阻趨秘殿壽如  
 山升如日願賡歸美之章衣之裳弄之璋更獻多男之  
 祝

賀重明節表

慶元二年

黃屋非心坐撫重離之節玉卮爲壽適臨載震之辰慶  
 溢宮闈歡均海宇中賀恭惟尊號太上皇帝陛下仁心  
 愛物德澤在民天下爲一家既全揖遜之盛域中有四

大獨冠古今之尊明繼聖而帝業愈隆子生孫而宗支  
 自衍咸啓華封之祝想闡漢殿之儀臣恪奉外祠遙瞻  
 慈極嵩呼萬歲莫陪就日之班花覆千官猶預需雲之  
 宴

賀瑞慶節表

虹流電繞式符長發之祥地闢天開方際中興之運一  
 人有慶萬壽無疆中賀恭惟皇帝陛下受命皇穹紹休  
 列聖問之朝問之野莫知神化之方作之君作之師獨  
 得道原之大惟此就盈之月是爲載風之辰仰三宮燕



吉之歡衍億世延洪之祉臣叨陪法從得奉真祠帝所  
遙瞻敢作鈞天之夢廷紳布列想聞嵩岳之呼

賀奉<sup>上</sup>壽聖隆慈備福光佑太皇太后壽成惠慈

皇太后聖安壽仁太上皇帝聖安壽仁太上皇后

冊寶禮成

皇帝表

尊處九重莫先于孝治慶綿四世俱上夫隆名誠振古  
之未聞喜當今之獨盛中賀竊以加光佑惠慈之號既  
歸二后之尊崇聖安壽仁之稱仍謹雙親之奉縉儀具

設綵仗交輝天地為之清明宗社于焉鞏固恭惟皇帝  
陛下日行舜德思廣文聲謂治國必自齊家惟篤近乃  
能舉遠矧當旋乾轉坤之始克躬問安視膳之勤迺因  
萬國之歡用顯三宮之懿臣屏居東甬寓直西清澤勞  
影纓雖阻陪于鳳蹕範金鏤玉徒想望于龍樓

太上皇帝表

備九重之色養祇奉慈仁得萬國之歡心載揚顯號皇

儀具舉孝治彌光中賀竊以聖聖相承本朝為盛安安

克遜三葉尤隆惟壽居五福之先惟仁在四端之首尊



無與二固不可以易言蕩無能名要當舉其大者恭惟

尊號

太上皇帝陛下躬帝堯之盛篤仲尼之恭廣大之

配乾坤宜享延洪之算忠厚之及草木益昌積累之休  
仰睿聖之趨期極愛欽而盡道親奉範金之寶首披鏤  
玉之篇兼衆美以特書祭彌文而相接凡居覆幬罔不  
瞻依臣頃侍詞垣茲歸真館飾琚瑀珎璜之佩莫陪天  
仗之朝聞鐘鼓管籥之音尚想龍樓之曉

太皇太后賤

尊處東朝坐見魯孫之孝治禮嚴北闕載加文母之鴻

稱大冊告成本朝增重中賀竊以壽先嚮用具著箕疇

聖本思齊是歌周雅慈為三寶之首既以益隆福者百

順之名又皆兼備茲仰鋪張之盛彌光保佑之功恭惟

尊號

太皇太后殿下德厚柔坤道參太極堯舜禹之相

授贊睿斷于宮中姜任姒之俱賢播徽音于宇內隆興

而後四舉緝儀紹熙之間存修盛事矧親提于神器付

託得人宜首上夫瑤編祇承于帝歡傳有截燕及無疆

臣嘗玷從班欣逢曠典宮闈再闢想聞天仗之來賀版

羣趨莫預廷紳之後



皇太后牋

鏤白玉之牒上徽稱于慈尊建翠華之旗藏壽儀于聖  
 代歡傳宮壺慶浹垓垓中賀恭惟尊號皇太后殿下德  
 媿娥婺聖齊任姒再世揖遜實參決于廟謨三宮康寧  
 爰竝崇于色養惟神孫之盡孝仰祖后以承休取仲尼  
 五美之言明老聃三寶之訓用形容夫懿範以昭著于  
 彌文臣退處海瀕阻趨天闕瞻壽慈之新榜莫預班聯  
 歌思齊之首章第勤頌禱

太上皇后牋

寶冊誕揚仰奉慈闈之懿徽稱備舉益增母道之光宗  
 社愈隆華夷交賀中賀恭惟尊號太上皇后殿下聖齊  
 任姒德媿皇英方綿四方之休親受九州之養王母之  
 坐少廣壽固無期騶虞之應召南仁不勝用仰嗣皇之  
 盡孝極禮典以歸尊三殿交歡萬方同慶臣比叨荷橐  
 茲獲奉祠引振鷺之班莫陪進旅而退旅粲珣珉之牒  
 更聽大書而特書

皇后牋

三殿祫容俱上鴻名之懿一人孝治端由內助之勤凡



屬照臨舉深抃蹈 中賀 恭惟皇后殿下慶綿奕世位處  
 內朝陰教所覃有卷耳穆木之美柔儀克謹奉長樂未  
 央之尊聿嚴揄翟之衣同上瑀珉之冊邦彝有耀家法  
 愈新臣頃玷禁途茲安海嶠側聞曠典但知獸舞之歡  
 遙望昕朝莫遂鳧趨之願

賀皇后受冊

皇帝表

廷揚大冊克備于稜容位正中闡聿嚴于內治歡傳禁  
 掖喜浹編民 中賀 竊以尊尊親親既極三宮之奉夫夫

婦婦是為萬世之基頒制紵于嗣服之初飾禕衣于歷  
 年之後禮文惟稱地道有光恭惟皇帝陛下德本世修  
 合由天作上未央之萬壽方陳漢殿之儀嗣太姒之徽  
 音更篤周詩之慶卷耳之志當佐于君子思齊之聖以  
 御于家邦朝夕永致其憂勤夙夜不忘于警戒于焉正  
 始豈專為恩臣退奉真祠恭聞盛典漢之廣江之永適  
 觀美化之流行渭之浹洽之陽咸慶舊章之復見

皇后牋

陳儀楓陛具昭丹冊之華正位椒塗光被禕揄之飾事



關宗社歡動宮闈

中賀

恭惟皇后殿下慶襲安陽行高

媯汭起家而居爵位蚤締天姻好述而樂鼓鐘益彰后


德密輔九重之孝治仰承三后之徽音盛典告成內朝

增耀臣祝釐惟謹竊粟自斲迹雖滯于周南化已行于


漢域禁林草制曾蒙乙夜之觀從橐趨班阻預長秋之

賀

攻媿集卷十六







攻勢集卷十六

